

# Restar visibels er en questa crisa

DA NAOMI ARPAGAUS/GIURU

■ **Durant ils davos mais è la crisa da clima ida in pau en emblidanza per blers, cunzunt er en las medias. Ils problems n'èn dentant anc ditg betg schliads, perquai vulain nus dar spazi qua ad ina giuvna che s'engascha per il clima e l'ambient.** *Selina Arquint* da Trin ha 17 onns, frequenta la scola chantunala a Cuira ed è activa en la chauma da clima.

**GiuRu:** *Selina, co è ti vegnida sin l'idea da t'engaschar per il clima?*

**Selina Arquint:** Jau hai gia ditg patratgà ch'il clima è in tema fitg impurtant e ch'i vegn fatg memia pauc cunter la crisa da clima. Cura ch'adina dapli giuvenils han entschet a Cuira cun demonstraziuns ha insatgi da la chauma lura scrit a mai e dumandà sch'jau lesia era far part. Quai era per mai la schanza da vegnir en il moviment e da vegnir activa.

**Co ha tes conturn reagì sin tia decisiun?**

En mia famiglia èn tuts plitost interessads en questa tematica ed han chattà bun. Era blers da mes amis ed amias han chattà quai bun ed in pèr dad els èn uss era sezs vegnids activs en il moviment. Cler devi era glied ch'era in pau sceptica u aveva pregiudizis, per exempel che nus lessan be demonstrar e betg ir a scola. Quai han ins schon udì in pèr giadas, ma tut en tut ha la glied ch'jau enconusch chattà bun ch'jau m'engasch.

**Co descrivessas ti la giuventetgna da clima?**

La giuventetgna da clima è in moviment che n'è atgnamain betg mo per la giuventetgna, mabain per tutt\*as. I sto dar la pussaivladad per tutt\*as da daventar activs en quest moviment, e nus vulain era discurre per tutt\*as, betg mo per la giuventetgna.

## A Cuira essan nus radund 30 persunas

**Quantas persunas èn activas en il moviment a Cuira?**

A Cuira essan nus var 20 enfin 30 persunas ch'èn activas. Natiralmain n'èn betg tutt\*as medem activ\*as, mabain mintgin\*a co ch'el\*la ha temp. Dasper questas persunas hai fitg blers che sustegnan nus. Quai èn forsa er anc ina giada 50 persunas che vegnan propi tar mintga demonstraziun e che gidan nus da mobilisar per las acziuns.

**Co èn ils pensums repartids sin las persunas che fan part?**

Impurtant è per nus ch'i na dat nagina ierarchia. I na dat pia nagin che po decidir dapli, nus decidin adina ensemen tut. Uschiglio datti gruppas da lavur che sa furman ord persunas cun ils medems interess e talents. Nus avain glied che fa ils designs ed ils flyers, autra glied scriva gugent texts etc. Uschia avain nus schon rollas, ma questas n'èn fitg flexiblas, e sch'insatgi n'ha ina giada betg temp sa gidan adina tuts. Nus avain in grond chat en il qual nus discutain adina, e mintga duas emnas avain nus ina sesida per puspè guardar tge via che nus lain ir e tgenins ch'èn noss projects. Medemamain discutain nus en questas sesidas nua che las singulas gruppas stattan. Igl è pia ina maschaida tranter far tut ensemen e mintgin che ha in pau il focus sin sias fermezzas.



Selina Arquint cloma parolas durant ina demonstraziun.

FOTOS MAD



La giuventetgna n'ha betg sa laschè franar durant il «lockdown». Cun quest'acziun sin la piazza da la regenza a Cuira han els empruvà da procurar per atenziun.

**Tgeninas acziuns avais vus fatg enfin ussa?**

Nus avain entschet suenter las emprimas demonstraziuns en Svizra a Turitg ed a Berna ad organisar atgnas demonstraziuns e chaumas a Cuira ed en il conturn. Cun il temp avain nus senti ch'i dovra in pau dapli, ch'i dovra er ideas ed acziuns pli concretas da nus. Lura avain nus entschet ad ans focussar sin singulas tematicas. Per exempel avain nus fatg in'acziun davart food waste ed in'otra davart consum e «Black Friday».

Era tar la revisiun da la lescha d'energia ch'era tema en il Grischun avain nus fatg propostas co che questa lescha duai vesair or. Las demonstraziuns dentant èn adina stadas ina gronda ed impurtanta part dal moviment e quelas vulain nus era far vinavant.

**Co èn vossas acziuns stadas influenzadas da la pandemia da corona?**

Avant la crisa eran nus vi da planisar in propi grond project cun ina demonstraziun che n'ha natiralmain betg pudì vegnir fatga, uschia che nus na savevan a l'entschatta betg tge far ussa. Lura avain nus empruvà da vegnir cun novas ideas, ed era propi blera glied ha gi ideas fitg creativas per far acziuns senza blera glied. In'acziun che nus avain alura fatg era l'acziun da colurar crappa e scriver si messadis per in bun futur. Quai era lura noss'alternativa per restar visibels er en questa crisa.

**Tgenins èn il mument ils pli grands problems en connex cun il clima?**

Il problem è atgnamain restà il medem. Tut en tut – gist durant la crisa da corona – han ins schon senti ch'ins n'ha betg

pli discurre uschè bler sur dal clima. Blera glied n'ha crai jau anc betg chapì quant nauschas che las consequenzas da la stgaidada dal clima èn, e quai è il grond problem. Quai n'è propi anc betg en ils chaus da tuts, schegea ch'ins senta gia ussa tge che la crisa da clima fa insumma. I dat adina dapli catastrofes, per exempel questa catastrofa cun l'eli ch'era dacurt a Maurizius, u quella en la Sibiria. Quai ha tut da far cun la crisa dal clima, ed ins senta dapertut las consequenzas. Nus vulain anc adina far attent sin quai, che propi mintgin ha da chapir che quai è propi privlus e che nus stuain far uss insatge. Nus na pudain atgnamain betg pli perder bler, nus pudain be anc gudagnar.

## I dat adina dapli catastrofes

**Co pon ins vegnir pli conscient e s'engaschar per l'ambient?**

Impurtant èsi segir da discurre cun la glied, cunzunt era cun la famiglia e da s'infurmar per survegnir dapli conscientia da la tematica e dad er infurmar glied ch'ins enconuscha davart las consequenzas. Uschiglio datti cleramain adina chaussas ch'ins po far en sia atgna vita, quai è natiralmain impurtant, sco per exempel da betg viagir mintga stad. Ma be questas chaussas na tanschan simplamain betg pli per propi salvar questa crisa. Igl è impurtant da vegnir activ ed i dovra er ina midada en la politica. Gist cun la lescha d'energia avevan nus contact cun la politica, ma sur la politica va tut vinavant be plaun ed igl è adina grev da chattar propi questas soluziuns ch'i duvrass. Nus empruvain adina da tshertgar il contact, ma ans vulain era focussar sin propi avair l'atenziun da la populaziun per quest problem e per las consequenzas.

**Co pon ins vegnir activ tar la giuventetgna da clima?**

Nus avain ina homepage «www.klimastreik-graubuenden.ch». Là chatt'ins atgnamain tut: in e-mail, links per ir direct sin ils chats da Whatsapp u Telegram – nus essan cunzunt fitg activs sin Telegram – ed ins po era scriver a nus direct via social media. Là datti ina persuna dal team d'organisaziun ch'è responsabla per persunas ch'han interess da daventar activas. Ins po dentant era vegnir ina giada ad ina da nossas sesidas senza esser lià.

**Tge giavischassas ti che sa midass en connex cun il clima en ils proxims tshintg onns?**

Jau giavischass ch'i dess propi in reponderar, pia che propi tut ils umans sentissan che la stgaidada dal clima è privlusa, e che la crisa è schon ussa qua e betg insatge che vegn a capitar insacura en 30 onns. Tge ch'è natiralmain er anc decisiv è ch'i suondan sin quai er acziuns, ch'i na vegn betg mo discurre.

**Tgeninas acziuns èn planisadas sco proxim?**

I vegn a dar in'emna d'acziun naziunala dals 20 fin ils 25 da settember a Berna. Avant questa acziun datti en l'entira Svizra puspè demonstraziuns, atgnamain noss comeback suenter la pandemia. Nus vulain puspè esser sin las vias. A Cuira vegnin nus a far venderdi, ils 11 da settember ina demonstraziun. Nus ans inscuntrain a las 17.00 davant il Parc Fontana. Mintgin astga vegnir, da mintga vegliadetgna, da mintga interess politic, mintgin ch'è da l'idea ch'il tema saja impurtant.